

Bosna i Hercegovina
Federacija Bosne i Hercegovine
Srednjobosanski Kanton/Kanton Središnja Bosna
KANTONALNI SUD U NOVOM TRAVNIKU
Broj: 128 0 K 033468 21 Kž
Novi Travnik, 08.12.2021. godine

U IME FEDERACIJE BOSNE I HERCEGOVINE!

Kantonalni sud u Novom Travniku u vijeću sastavljenom od sudija: Darmina Avdić, kao predsjednik vijeća, Zuhdije Ćosić i Lazarele Porić, kao članovi vijeća, uz sudjelovanje Ivane Ćorić-Žderić kao zapisničara, u krivičnom predmetu protiv optuženog M.K. zbog krivičnog djela Utaje iz člana 290. stav 5. Krivičnog zakona Federacije Bosne i Hercegovine, rješavajući po žalbi optuženog lično, izjavljenoj protiv presude Općinskog suda u Jajcu broj 128 0 K 033468 21 K od 26.05.2021. godine, na sjednici vijeća održanoj dana 08.12.2021. godine, donio je sljedeću

PRESUDU

Žalba optuženog M.K. odbija se kao neosnovana i potvrđuje se presuda Općinskog suda u Jajcu broj 128 0 K 033468 21 K od 26.05.2021. godine.

Obrazloženje

Presudom Općinskog suda u Jajcu broj 128 0 K 033468 21 K od 26.05.2021. godine, oglašen je krivim M.K. (u daljam dijelu: optuženi) zbog krivičnog djela Utaje iz člana 290. stav 5. Krivičnog zakona Federacije Bosne i Hercegovine (u daljem dijelu: KZ FBiH), za koje mu je po članu 43. i 62. KZ FBiH izrečena uvjetna osuda kojom je utvrđena kazna zatvora u trajanju od 3 (tri) mjeseca koja se neće izvršiti ako optuženi u roku od 1 (jedne) godine ne počini novo krivično djelo. Istom presudom po članu 202. stav 1. Zakona o krivičnom postupku Federacije Bosne i Hercegovine (u daljem dijelu: ZKP FBiH), optuženi je obavezan da naknadi sudu paušal u iznosu od 50,00 (pedeset) KM.

Protiv te presude u zakonskom roku žalbu je izjavio optuženi, samo zbog odluke o troškovima krivičnog postupka, u kojoj žalbi navodi da je nezaposlen, da je lošeg materijalnog stanja, pa traži da mu se snizi plaćanje troškova krivičnog postupka u vidu paušala od 50,00 KM, u kojoj žalbi nije tražio da bude obaviješten o sjednici vijeća.

Odgovor na izjavljenu žalbu podnesen je od strane Glavnog kantonalnog tužioca u Travniku (u daljem dijelu: tužilac) broj T06 0 KT 0028544 21 od 29.07.2021. godine,

kojim su osporeni prigovori iz žalbe, s prijedlogom da se žalba optuženog odbije kao neosnovana, u kojem odgovoru nije traženo da budu obaviješteni o sjednici vijeća.

Na sjednici vijeća ovog suda održanoj u skladu sa članom 319. stav 8. ZKP FBiH, koja je održana bez prisustva stranaka pošto u izjavljenoj žalbi i odgovoru na žalbu, nije traženo da budu obaviješteni o sjednici vijeća, pa nakon što je ovaj sud ispitao pobijanu presudu u granicama žalbenih prigovora, u smislu člana 321. ZKP FBiH, a po službenoj dužnosti da li je na štetu optuženog povrijeđen krivični zakon, odlučio je kao u izreci iz sljedećih razloga:

Imajući u vidu prednje istaknute žalbene prigovore, po ocjeni ovog suda, tako istaknutim paušalnim žalbenim navodima, za koje uz žalbu žalilac nije ponudio nikakve argumentovane dokaze, to onda takvom žalbom ni na koji način nije doveo u sumnju zakonitost pobijane odluke o troškovima krivičnog postupka, koja je u svemu sukladna sa članom 201. stav 1. ZKP FBiH, na koje odredbe se pozvao prvostepeni sud u pobijanoj presudi, a ovo pogotovo što prema odredbi člana 202. stav 1. ZKP FBiH, proizilazi da „kad sud optuženog oglasi krivim izreći će u presudi da je dužan da naknadi troškove krivičnog postupka“, a zatim i što je odmjereni paušal u konkretnom slučaju, u svemu sukladan sa članom 199. stav 2. tačka g) ZKP FBiH.

Sa izloženog, imajući u vidu i ostale žalbene navode, ovaj sud je po članu 328. ZKP FBiH, odlučio kao u izreci.

Zapisničar
Ivana Čorić-Žderić, s.r.

Predsjednik vijeća
Darmin Avdić, s.r.